

欽定剿平粵匪方略

欽定勦平粵匪方略卷一百九十一 戊午年

三月十四日

庚寅

福濟鄭魁士奏言和州

衝要餘全門戶自去年十月間前總兵音德布由河村鋪退守官渡該州卽爲賊踞以致餘全多警北竄時虞三月初一日參將錫昌督兵由赤鎮過河副將惠成等由官渡過河分三路進搆探知河村逆匪三百餘名已踞香泉舊營我

軍奮勇直攻逆伏不出河村鋪又來賊二千餘名兵勇分投迎敵殲斃執旗賊酋一名追殺百餘名初二日仍分路進圍河村鋪逆匪出隊拒戰惠成等揮兵急進賊退入巢我軍卽在附近村莊屯紮更番轟擊鮑雲翥由烏衣帶勇會攻初三日黎明鮑雲翥密從西路梟水過濠施放火箭賊篷火發惠成卽督兵由北面大路直入

錫昌等由東路金家樓奮擊賊向河村橋南路
逃散冀圖竄併入城我軍跟追城內之賊傾巢
分路來救兵勇乘勝迎勦敗賊不能整隊惠成
等卽由河村南面入城鮑雲翥先由西門襲入
王士雄等由東門襲入錫昌等由西門繞襲南
門與惠成合兵追勦直抵和陽橋斃賊二千餘
名落河死者不可勝計遂將和州克復臣鄭魁

士已於初二日由廬郡挑派隊伍三千餘名親督起程行至中途據惠成等稟報前來查該副將等謀勇兼全辦理妥速先行開列額懇

天恩分別給予獎勵其餘出力員弁兵勇並請擇尤保獎惟和州爲北岸上游必爭之地堵截宜嚴皖省兵力不敷暫令惠成等扼要設防一面咨請德興阿酌派鎮將分帶勁旅及紅單礮船沿流

上溯協守和州會合攻剿江岸賊壘伏祈

飭下德興阿等速派五六千人來皖併力堵扼現在和

城東北烏江芝蔴河等處賊營恃險負固必須

乘勢掃蕩臣鄭魁士抵和察度形勢卽督全隊

親往剿除再圖巢縣以清腹地探聞六安賊匪

分赴舒桐尙有窺伺廬州乘間北犯之意廬城

防守事宜暫飭副都統麟瑞會同總兵嵩瑞扎

隆武妥辦仍由臣福濟督率調度奏入

上命軍機大臣傳諭德興阿福濟曰和州爲北岸上游要地旣經攻克自當扼要設防福濟因兵力不敷分布請飭德興阿選派鎮將統帶勁旅五六千名會同守禦原爲斷絕賊援之計惟江浦雖經克復而九洲一帶賊匪尙多昨因和春大營分兵赴援浙東恐東壩等處空虛已諭德興阿酌撥兵勇二三千名交

和春等布置能否調撥若干名尙未據德興阿等覆奏未必有五六千名之衆抽赴和州德興阿現在掃蕩九洲一帶餘匪卽著節節進剿並飭舟師上駛與惠成等所帶之兵聯絡聲勢毋庸另議調撥昨已降旨派湖北提督德安會同福濟辦理軍務鄭魁士已調往和春軍營德安行抵廬州卽著鄭魁士交卸前往金陵福濟當與德安同心協力共籌剿賊之策

力保廬城毋稍疏懈

上諭內閣曰此次官軍以少勝多攻奪要隘克復和州
城池勦辦尙屬得手仍著福濟等督飭將弁迅將和
州東北烏江芝蔴河等處賊營一律掃除再行進攻
巢縣以清腹地
在事出力之雲南維西協副將惠成
著記名以總兵卽用
湖南永綏協副將鮑雲翥著賞
給圖哩模格依巴圖魯名號
江蘇城守營參將錫昌

雲南龍陵營參將胡會龍均著以副將儘先升用雲南都司王士雄著以遊擊儘先升用並賞換花翎其餘出力員弁兵勇著該撫擇尤請獎

福濟鄭魁士又奏言臣福濟查盱眙縣蔣壩地方與清淮接壤該處釐捐前由邵燦庚長經收支應蔣壩兵勇口糧現在瓜州江浦先後克復江北漸次肅清蔣壩之防必當盡撤請將該處

釐捐由臣委員接辦稍助廬營兵糈奏入

上諭內閣曰安徽盱眙縣蔣壩釐捐准其改歸安徽由
福濟委員接辦以助廬州軍餉

十五日辛卯晏端書奏言據金衢嚴道繆梓稟稱

遊擊楊國正從官溪進紮排山距廣豐城十餘
里二月二十四五等日該逆分股由大南橋入
都西山三路前來攻撲我軍轉戰一晝夜因賊

已抄越官溪前後受敵祇得繞道退至清湖該
逆旋於二十九日由官溪進犯該遊擊等不能
抵禦適徽營遊擊王恩榮帶隊七百餘名行抵
常山繆梓卽令往援與賊接仗頗有斬獲亦因
寡不敵衆一併退紮江山其時浦城之賊已於
二十二日攻陷縣城與江山壤地相接玉山股
匪亦全注於江山饒廷選因江山逼近衢郡恐

賊乘虛直入當派兵勇二千餘名留防玉山並
飭副將周萬遠帶勇六百餘名赴援江山該總
兵自帶親軍一千餘名回至常山與繆梓面商
派勇一千餘名分守常山之屏風關大洋橋兩
處要隘隨於三十日同回衢州商辦防勦等情
查江山兵單賊衆恐難支持若再竄撲衢郡更
成燎原之勢浦城復界連處州可以繞赴衢州

之後金嚴以下路路可通非厚集兵力斷難力
遏兇鋒仰蒙

聖主垂念衢防緊要

飭下和春張國樑許乃釗迅撥援師並蒙

諭令耆齡調派劉長佑諸軍前來防勦臣頃准和春許

乃釗來函已派總兵明安泰帶兵勇二千餘名
赴援又先後接張芾咨會深慮衢防危急除前

撥募防兵勇一千七百餘名外續令參將余永
椿派勇四百名皖南鎮總兵江長貴親帶勁旅
一千名總兵周天受由南陵帶所部兵勇千餘
名一併赴衢會勦臣已分別迎提至衢防官兵
必得久經行陣之大員統率各隊方期指揮得
力查周天受威望素著紀律更嚴臣已咨請該
總兵節制調度以一事權金華嚴州一帶已與

紳士戴熙等會商分撥錢江水勇兵船扼要堵
截並飭富陽桐廬建德各縣一體嚴防將夏寶
慶所帶健勇六百餘名飭赴嚴州扼紮蘭谿龍
游西安等縣或招募民團或派撥官兵均已一
律布置惟自衢至省計程七百餘里以嚴州爲
適中扼要之地現當水陸戒嚴官兵過往絡繹
所有催趨策應事宜臣已飭委署臬司段光清

前往駐紮辦理至省城兵勇均已徵調四出現
與將軍瑞昌會商請於駐防乍浦之滿洲營官
兵移調四百名來省以資防守

晏端書又奏言據繆梓來稟江山之賊於三月
初一日圍攻遊擊王恩榮營盤另股竄入江山
縣城該遊擊甫經衝出重圍縣城業已失陷該
鎮道集勇三千餘名力守郡城一面飛稟福興

催令李元度從玉山至衢會勦等情查周天受
江長貴兩軍計可先後抵衢昨又飛咨鄧紹良
抽撥勁旅並催明安泰一軍速來會勦所有省
防事宜現與將軍瑞昌暨在省文武官紳妥籌
布置臣擬酌帶省兵親往督辦至江山縣失守
以後在城文武下落及軍營堵勦不力員弁容
俟查明另辦臣於三衢軍務調度無方以致縣

城失陷咎實難辭相應請

旨飭部將臣先行議處奏入

上命軍機大臣傳諭瑞昌晏端書曰江西大股賊匪分竄玉山廣豐直趨江山以致縣城失陷晏端書現調江長貴等赴衢會勦而玉山一帶留防兵勇僅有二千餘名尙覺單薄深恐賊匪乘虛竄入不可不通籌兼顧其派往江山之兵旣統歸周天受調度卽著督

飭在事文武奮力攻勦速克縣城如果事機緊急必須該撫親往所有省城防守事宜卽交瑞昌督同文武官紳妥籌布置晏端書奏請調乍浦滿洲兵四百名來省協防著准其如數調往以資防守

上又命軍機大臣傳諭福興耆齡曰晏端書奏浙兵於廣豐江山之間接戰不利江山縣城於本月初一日被賊攻陷現已飛咨福興催令李元度由玉山前赴

衢州堵勳等語福興駐紮江西東路當賊匪由撫建
上竄株守信郡致賊衆竄擾河口鎮蔓及廣豐分犯
閩浙厥咎甚重浙省自江山以下無險可扼全省震
動且浦城業已失陷處州等屬均須嚴防本省兵勇
實屬不敷分撥此時李元度當已親赴上游亟應繞
出賊前方可得手著福興耆齡飭令該同知統率平
江勇及奇兵彰武等軍速由玉山前赴衢州會同浙

省兵勇迎頭截擊務將該城克復毋令再有滋蔓江西如尚有可撥之兵卽著耆齡迅速添調爲李元度後路援應至賊匪旣陷江山豈可再任後路之賊源源繼進著福興一面催調李定太各軍一面親督現有兵勇察度賊勢緊急之處實力截擊儘再敢擁兵自衛觀望不前則咎有攸歸斷不能倖邀寬貸也

上諭內閣曰江西賊匪竄擾江山縣境於三月初一日

圍撲遊擊王恩榮營盤另股乘間竄入縣城晏端書
未能先事豫防著交部議處在城文武下落著查明
具奏該處軍營差委員弁堵勦不力並著查明叅辦

十六日

壬辰

福興奏言沙溪逆匪愈聚愈多廣豐

大股復由觀音橋竄近玉山東路常玉喫緊該
逆分屯散布無非牽掣我軍必須先將沙溪一
股殲除再行進勦沙溪各軍於二月二十八日

夜分隊前往外委韋上元從下游渡河潛伏於南岸山後都司馮日坤等於寅刻督隊自沙溪渡河分兩路潛進施放槍礮該逆驚駭狂奔自相踐踏擊斃三百餘人後路踞匪傾巢接應正鏖戰閒下游潛渡之軍已從山後直擣其穴該逆不戰自潰各營會合攻擊追殺十餘里將賊壘六座全行燒燬天明始行收隊賊衆均遁赴

大南橋而去續探廣豐圍城之匪分竄玉山六都七都地方臣卽令沙溪各軍馳至玉山會同饒廷選一軍合力堵勦旋接饒廷選稟報圍擾廣豐之賊二十七日竄撲排山遊擊楊國正一軍退紮清湖二十九日該逆糾集七都一股悉衆猛撲楊國正又由清湖退回江山縣城該總兵卽由玉山率領浙兵親往籌辦等因查信郡

防務稍鬆圍攻廣豐之賊經參將胡定國等屢挫兇鋒大股匪徒均竄赴江山一路目前衢州軍情緊急自須親往赴援所有玉邑防務當飭同知李元度統帶平江左右兩營馳赴駐守並飭李元度催提長左等營察看信屬各路情形分派嚴防其信郡守備事宜飭令九江道沈葆楨妥籌布置臣卽日親督各軍馳往衢州會同

扼勦奏八

上命軍機大臣傳諭福興曰昨諭福興等飭令李元度
剋日赴衢茲據奏稱已飭李元度駐守玉山並飭九
江道沈葆楨布置廣信各軍相機堵勦福興親赴衢
州著卽督飭援兵會同饒廷選等以勦爲防務將江
山縣城迅速克復以免賊蹤滋蔓惟各軍全赴衢州
恐廣信玉山等處空虛亦屬可慮著福興妥爲調度

勿致顧此失彼

十七日

癸巳

王懿德慶端奏言據臬司保泰等稟

稱逆衆數萬疊擾河口鉛山紫谿車盤等處崇
安分水各關密邇寇氛經崇安縣知縣莫自逸
署遊擊吳鴻源等各帶兵勇出勦二月十六日
該逆大股直撲岑陽關口兵勇奮力攻擊斃匪
數十名該逆愈聚愈多我軍寡不敵衆致被關

竄刻下崇安縣城危在旦夕其江右廣豐賊匪
距浦城二渡關僅十餘里防務亦屬喫緊該逆
並由岑陽小路擁至浦城石陂街等語查江右
鉛山廣豐緊接閩疆自該逆竄擾鉛山則崇安
藩籬已撤遊擊賴高翔統帶漳兵由閩省調赴
廣信防勦於二月初五日在石塘地方陣亡賊
勢益形猖獗現計在防兵勇六千餘名分派常

玉江開等處並山浙江撫臣添調兵五百名馳
赴協守均歸總兵饒廷選金衢嚴道繆梓調遣
饒廷選現在大南橋地方遇賊接仗未能得手
崇安浦城爲閩浙咽喉建甯郡城乃全閩保障
該逆竄踞石陂與建郡相距咫尺尤屬可危亟
應添兵堵剿除催提各路官軍外一面督飭軍
需局司道籌撥糧餉軍火源源接濟並飭臬司

保泰就近妥籌調度至邵武汀州延平等府亦
飭加緊防範不得稍有疏虞奏入

上命軍機大臣傳諭王懿德慶端曰王懿德等奏江西
逆匪由鉛山等處竄擾閩境分撲崇安浦城軍情緊
急等語昨據晏端書奏浙之江山與閩之浦城已先
後失守該督等發報時自係尙未知悉所派兵勇均
係零星湊撥此股賊勢兇悍深恐不敷抵禦所有帶

兵鎮將必須選派得力之員方能制勝速將浦城克復其崇安竄匪旣闖八岑陽關該縣亦屬喫緊前諭王懿德調兵赴援江西此時閩境兵力不敷恐難兼顧鄰省著俟浦城崇安賊氛稍靖卽將此兩路兵勇分投出擊以勦爲防毋庸另行調撥

同日何桂清趙德轍奏言臣等前聞玉山喫緊廣豐被圍浦城失事當因玉山爲常山之屏蔽

又與江山毗連卽函商和春張芾調派遊擊王
恩榮帶兵二千就近馳援總兵江長貴帶兵一
千接應並將在南陵勦匪之總兵周天受調回
帶兵一千六百名前往接替江長貴回顧徽州
復經和春遵調總兵明安泰統帶勁旅二千一
百餘名由常州蘇州杭州而去適前任雲南鶴
麗鎮總兵余萬清告病回籍道出蘇州藩司王

有齡因其籍隸金華久在軍營晤商該總兵派員前赴江甯一帶募勇一千名爲明安泰之後勁續據王有齡稟接浙江公局司道函報江山縣城已於三月初一日失陷查江山以下並無險要可扼亦無重兵堵禦不過三數日可抵杭州浙江餉需短絀軍情喫緊當飭王有齡竭力籌湊接濟以定人心至金陵城垣九十餘里非

四面合圍不能斷其接濟辛張國樑不避艱險
就現有兵力先從東北二面著手督飭各鎮將
將東北城外賊巢掃蕩一空築壘自固卽於壘
外深挖長濠五十餘里寬深一丈五尺將挑出
之土築牆蔽壘使該逆不敢衝突然後抽調東
北之兵以圖西南迨攻拔秣陵關後張國樑因
兵力不敷雨花臺險峻難拔督率將士裹糧疾

趨極西濱江之板橋三山一帶並密調賴鎮海
師船乘風上駛與陸兵會合該逆疑從天降望
風而靡數日之內由西勦洗而南七八十里之
賊巢盡行平毀因糧於敵聯絡紮營已與東面
營壘相望現擬倣照東北挑挖濠牆一俟挑築
完竣該逆卽束手待斃自江浦報捷後現在進
攻九洲賊壘臣等正幸南北兩營日有起色

聞

不意浙東猝聞告警江浙肩齒相依臣等惟有竭力救援以維大局奏入報

十九日

乙未

李孟羣奏言

臣於固始解圍後卽飭

各營跟蹤追勦據探另股髮逆由潛太英羅內犯援助撲固之匪因聞固始圍解圖犯商城逆首僞城天豫碇天燕等已到金家寨一帶六安

賊匪復由顧家店等處竄至固境之黑樓地方
等情查該逆折入河西臣方在固籌糧且因豫
防未固暫資鎮壓乃兩路之賊又復紛至沓來
卽派都司潘羅成等帶勇一千名馳往商城迎
勦金家寨之賊都司楊光澤等由樟柏嶺迎勦
黑樓之賊參將會秉忠帶隊進紮武廟集以爲
兩路應援於二月三十三月初四五等日分投

迎勦殲賊甚多探聞圍攻黑樓之賊由東敗竄
我軍整隊窮追獲賊三十餘名河西逆股旣經
擊退則金家寨之逆勢亦孤金家寨爲三省關
鍵不可任賊盤踞當派盧又熊暫防東路而以
楊光澤等馳往助勦曾秉忠督兵應援並飭袁
懷忠派勇千名由李家集折赴上游合勦其由
南路進攻六安之勇亦飭袁懷忠斟酌情形如

六安可以速得則勿庸調回否則由該員悉帶
赴金家寨先將此股髮逆擊散則六安之敗匪
易圖惟臣駐此多日僅得數日之糧昨飭豫省
州縣無論何款設法撥銀二千兩米千餘石又
恐呼應不靈前奉

諭旨飭撫臣英桂進援商城臣俟豫兵到防查看情形
或留兵協剿卽由東路旋皖抑須親往督勦暫

緩回皖之處屆時斟酌辦理總期殄除餘孽仰
慰

宸廑奏入

上命軍機大臣傳諭李孟羣曰固始解圍後仍有續至
匪黨欲圖竄擾雖經李孟羣分撥官兵連獲勝仗而
金家寨尙被盤踞自應先將此股擊散該藩司因兵
糧無措暫駐固始籌辦兼因賊匪初退防守未固藉

資彈壓俟英桂派兵前往接替李孟羣著卽折回六安協同勝保督飭袁懷忠等進兵以期早拔孤城

二十日丙申福興奏言臣於本月初三日分派各

隊自玉山常山兼程行走初五日頭隊馳抵衢郡時江山縣城業已失守大股賊匪竄近衢郡二十里之航埠地方分股窺伺郡城總兵饒廷選正在麾軍迎敵都司銜熊應文等卽率頭隊

兵勇接應將賊擊退二隊兵勇亦於是日行至
航埠北岸適有匪眾在該處擄船搭造浮橋竄
過數百人意圖阻我進援衢州之路都司馮日
坤等奮力衝殺頗有斬擒該逆逃回南岸我軍
趕抵郡城臣督帶後隊於初六日到衢初七日
逆眾三四萬撲近郡城各勇相持四時之久賊
力已乏臣遂飭都司馮日坤等從東門出外委

韋上元等從小南門出該逆抵死抗拒愈集愈多都司林保等帶領兵勇自南路橫衝而入直搗中堅賊勢不支紛紛潰敗東路之賊亦經馮日坤等督勇擊敗我軍逼近賊壘該逆棄營而遁連毀賊營十七座追奔二十餘里斃賊三千餘人此次逆匪竄犯衢郡臣所帶援軍僅有數千合以本郡防兵不過一萬餘人賊數約有八

九萬之多幸賴軍心尙固力遏兇鋒城中人心亦皆安定惟該逆又糾黨來犯人數較前尤多仍圖於郡城南面分紮營盤其另股又從上游竄過北岸亦謀結壘肆擾臣與饒廷選會商先將對岸之賊派隊勦除卽在該處擇要安營以顧郡城餉道仍於迤東分軍扼紮爲城中犄角之勢一切守備事宜均已飭令該鎮道趕緊布

置

同日晏端書奏言江山之賊糾合玉山廣豐各路股匪直趨衢州總兵饒廷選先於玉山調回副將周萬遠一軍扼守東門又派安勇及川貴各勇駐防西門二月初五日該逆大股直竄郡城分撲大南門小南門小西門該鎮道分飭各勇出城迎擊其時西安將軍福興先派兵勇自

玉山前來援應周萬遠亦從東門夾勦我軍力
戰四時斃匪約千餘人該逆旋於郡城東路龔
家埠起至西路銅錢嶺止紮營三十餘座福興
督帶親兵自玉山取道航埠於初六日行抵衢
州初七日該逆大股攻撲衢勇營盤福興傳令
各軍由小南門出饒廷選周萬遠分路督戰逆
衆大亂官軍乘勝追殺十餘里連毀東路賊營

二十餘座其西路銅錢嶺賊營亦被鄉民焚燬
我軍酣戰數時斃賊二三千人大獲全勝其離
城十餘里地方尙存大小逆卡三四座該逆又
於初七日夜偷築二三十座由饒廷選等稟報
前來查該逆自竄入江山糾合江右股匪直竄
衢州甚屬猖獗幸該鎮道先期布置又得福興
派軍來援並親臨督勦兩次均獲勝仗洵足挫

遇賊鋒現在周天受江長貴兩軍初八日同到
衢州均駐紮西門外先杜其竄越龍游嚴州之
路明安泰一軍初十日過杭由水路前進鄧紹
良又派遊擊田應科統帶彪勇虎勝勇由徽州
取道前進望後均可抵衢統計福興援師六千
餘名周天受江長貴援師千餘名明安泰援師
二千餘名鄧紹良援師一千四百名省城調往

官兵一千二百名合之三衢原防兵勇五千餘
名聲勢頗壯惟兵數旣多深恐事權不一應將
金陵江西兩路官軍統歸福興節制調度徽州
浙江兩路官軍統歸周天受節制調度並責令
饒廷選等會同策應剋期合剿迅克江山縣城
至浦城信息隔斷深慮賊由處州分股內窺並
恐江山之賊由間道窺伺金華業已嚴飭營縣

偵探堵禦並囑回籍總兵余萬清募勇一千名
會合民團嚴扼各路要隘均奏入

上命軍機大臣傳諭福興晏端書曰江山之賊糾合玉
山廣豐各股匪趨撲衢州數至巨萬經饒廷選等先
期布置激勵民團福興復親至督勦稍挫兇鋒衢郡
爲浙東門戶雖得勝仗匪勢尙屬猖獗晏端書奏該
逆於初七日夜間偷築營壘二三十座必得盡數攻

毀方可進復江山縣城福興所部援軍已有六千餘
名加以三衢防勇省城續調官兵及周天受明安泰
等軍爲數約二萬有餘足資掃蕩所有金陵江西兩
路官軍著歸福興調度徽州浙江兩路官軍著歸周
天受調度該將軍等迅卽併力會剿先清附郡賊壘
卽日乘勝攻克江邑再圖進剿其常山玉山等處著
仍遵前旨分兵防堵不可專顧一路至界連浦城之

處州所屬龍泉等縣著晏端書嚴飭該地方官力防
內竄江山之賊亦恐由閒道窺伺金華余萬清所募
鄉勇卽飭會合民團扼守要隘

晏端書又奏言前因賊竄廣豐經臣奏委署衢
州鎮中營遊擊楊國正赴江山防勦並解廣豐
之圍該遊擊旋在排山失利退回清湖兵勇不
復成伍徽營遊擊王恩榮馳往救援截賊於五

里亭楊國正不與合勦並有縱容彪勇與民團
格鬪之事迫聞繆梓自常山回郡該遊擊卽退
往常山王恩榮孤軍無援致賊乘虛而入亟應
嚴行查辦應請

旨將楊國正先行革職拏問由臣提解來省嚴審確情
奏請治罪候選道薛輔清管帶安勇駐防江山
城外自楊國正退往常山後該員所帶之勇亦

紛紛效尤不能約束咎實難辭應請

旨將薛輔清卽行革職永不敘用其所部之勇咨行饒
廷選繆梓逐加挑選派員接管花翎留浙補用
守備瞿先仲在饒廷選部下管帶楚勇不能得
力應請

旨將瞿先仲拔去花翎暫行革職以觀後效候補知縣
徐兆森經繆梓派赴衢防支應局當差該員一

聞江山有警私自回杭實出情理之外應請

旨將徐兆森先行革職仍飭查經手支應款項有無虧
短另行覈辦奏入

上諭內閣曰署浙江衢州鎮中營遊擊楊國正管帶兵
勇前赴江山縣防勦旋在排山失利節節退避致賊
乘虛竄入縣城候選道薛輔清守備瞿先仲知縣徐
兆森或帶勇不能約束或聞警先逃回省均出情理

之外楊國正著先行革職拏問交晏端書提審確情
再行奏請治罪薛輔清著卽行革職永不敘用瞿先
仲著拔去花翎暫行革職以觀後效徐兆森著卽行
革職以示懲儆

二十五日

辛丑

李孟羣奏言探聞逆首僞城天豫

砣天燕等擁衆萬餘由英山羅田竄至商境之
土鎮寨一帶與金家寨互爲犄角副都統勝保

因擒匪回窟雉河老巢由三河尖河口集一帶
督勦未能兼顧商城令臣專勦商境之賊三月
初九日我軍分路進勦該逆設伏迎拒潘羅成
等卽帶勇直攻金家寨河南撫臣所派知縣吳
昭坤等帶勇一千二百人由李家集一帶兜勦
逆匪正在兩面拒敵知府袁懷忠復派兩營由
西山繞出其後該逆驚惶失措越嶺逃窟我軍

分路追剿共殺賊一千餘名生擒七十餘名賊
由松子關竄往湖北麻城羅田交界地方現在
商城肅清臣應卽速回六安與勝保聯軍進攻
州城所有商境剿賊出力員弁可否容臣擇尤
酌保出自

恩施奏入

上諭內閣曰此股賊匪由英山羅田竄至商城經李孟

羣派兵勦辦該逆窮蹙逃竄斬馘甚多辦理尙爲妥速所有在事出力員弁兵勇准其擇尤保奏

二十八日

甲辰

福興奏言衢州撲城逆匪經我軍

擊敗後遂不敢逼城而營卽於附郡十里內外分屯散處由西南面至東面蔓延數十里意圖四面合圍爲久困郡城之計臣卽督率總兵饒廷選等趕緊開浚城濠密釘椿籤於城上添設

滾木檣石晝夜登陴不敢稍涉疏懈並將臣所帶援軍分紮北門外之浮石渡兩岸以顧水路餉道而通城中聲氣初九日總兵周天受江長貴督率徽防兵勇二千餘人同時趕到卽在東北之樟樹潭扼紮距郡城十五里十一日大股逆匪竄至東門外之七里街圖擾下游斷我糧路卽經官軍擊退十二日該逆又糾集大股由

東南兩路分撲各營 臣飭各勇固守營壘俟賊
衆撲近迎擊斃賊百餘名該逆分股包抄我營
之後總兵饒廷選添派兵勇由東門前往接應
臣督令副將張騰蛟等分三路迎敵該逆亦傾
巢由西南一帶叢擁前來我軍奮勇進攻都司
馮日坤等復從北路抄出賊後與東路各隊兩
面夾擊都司林保等督隊從旁衝入將賊陣分

爲數段該逆力不能支遂向東南逃竄各兵勇併力追勦斃賊五百餘名十三十五等日該逆屢糾大股猛攻郡城各軍奮勇衝殺臣親歷行間督勦斃賊七八百人落水死者尤衆餘逆全數敗退查逆匪自竄擾衢郡意在圍困郡垣故於東西南三面分布結營圍竄北岸斷我城中接應之路經臣將原帶各軍分紮於浮石渡之

南北兩岸與郡城聯絡其下游樟樹潭要隘亦
經周天受等移軍駐紮以防龍游一路惟北岸
路徑叢雜若該逆另由西北開道繞出浮石渡
之後可以直趨壽昌實爲入杭捷徑據浙江撫
臣咨江南大營分撥兵勇二千餘人飭總兵明
安泰統帶來衢俟該總兵到防後察看情形如
果北路喫緊臣卽親督各軍擇要扼紮現在賊

勢東至河灣西至龔家塢棋布星羅江山之賊
分擾常山逆黨甚衆惟有督率各營設法攻勦
以保郡城而杜內竄陣亡之廣東黃岡協左營
外委鄭宜勇上年貴溪解圍案內擬保把總此
次血戰捐軀殊堪憫惜可否

飭部照把總例從優議卹奏入

上命軍機大臣傳諭福興曰逆匪竄撲衢城於東西南

三面分布賊營意圖圍困雖經福興督飭各軍於東北兩路連獲勝仗而附城一帶賊勢尙多江山之賊復分股擾及常山該處如何設備開化玉山亦當兼顧周天受江長貴久歷戎行當此賊勢狡猾必能痛加勦洗饒廷選防守三衢是其專責前此退紮玉山不能力遏賊鋒若再不知奮勉自問當得何罪明安泰帶兵赴浙聞其道過常州領餉幾至釀成事端著

福興傳諭該總兵將所帶兵勇嚴加約束以肅軍律
福興等布置定妥卽著分投攻勦以保浙疆而全大
局毋得曠日持久致有疏虞

上諭內閣曰逆匪竄撲衢州經福興督兵分路攻擊連
獲勝仗勦辦尙屬得手仍著福興等嚴督兵勇迅掃
賊氛並將江山縣城克復毋稍遲延陣亡之外委鄭
宜勇著交部照把總例從優議卹

二十九日乙巳何桂清奏言衢州之賊於三月初

七日擊退後乘我援兵未集卽於是夜仍回故壘延亙二十餘里幸周天受江長貴先後趕到屢次攻勦獲勝未卽下竄而逆賊日聚日多負隅不退據徽州探報常山失守開化縣之華埠鎮已有賊蹤並有由浦城江山分竄遂昌之謠查該逆前在江西分爲三股以一股牽綴廣信

玉山之軍一股由鉛山竄入浦城一股由廣豐
竄入江山合力窺伺浙東今我援兵雲集衢州
該逆若犯遂昌卽可直趨金華處州設犯華埠
則比可至婺源休甯東可趨遂安嚴州皆已繞
出衢州之後浙皖江蘇全行掣動臣接張芾來
函已調鄧紹良所部兵勇一千四百名馳守開
化又接晏端書來函總兵周天受江長貴力扼

衢州東北堵截下竄龍游嚴州之路於十五日
大獲勝仗各等情晏端書現飭明安秦會同周
天受等由東北進兵先清此兩路之賊然後由
西南兩路進勦圖復江山常山福興統率所部
督飭總兵饒廷選專守衢州府城至浙江皖南
江西餉源半藉河口鎮之鹽茶課釐上海茶葉
之來路亦在於此今該逆滋擾閩浙江西交界

地方餉源阻塞浙江金衢嚴溫處戒嚴正項錢糧又催徵不前晏端書及浙江籌防局司道請江蘇協濟之書絡繹而來江浙軍餉同一來源浙江短絀江蘇不能獨裕應請

飭下浙江撫臣晏端書熟商司道會同紳董通籌全局不論何款應催提者迅速催提應截留者迅速截留不得以江蘇之協濟爲可恃以免貽誤事

機奏八

上命軍機大臣傳諭和春何桂清張國樑許乃釗曰此
次賊勢甚衆周天受等力扼東北福興督飭饒廷選
守禦府城能否擊退尙無把握江南正在圍攻金陵
前已分撥明安泰一軍赴衢援應自難再撥惟浙省
應防要隘甚多一有疏虞則賊黨順流而下不獨杭
嘉湖各郡無險可守卽蘇常亦朝發夕至東南大局

將不可開設或衢州兵勇不敷堵截事在緊急著和
春等再派得力鎮將酌帶勁旅救援保浙省卽以保
江南腹地務當權其緩急通籌辦理何桂清奏請飭
浙撫自籌軍餉不得專恃江南協濟等語已諭晏端
書設法措置何桂清仍當不分畛域維持全局

上又命軍機大臣傳諭晏端書曰何桂清奏竄擾衢州
之賊日聚日多探報常山失守開化縣之華埠鎮已

有賊蹤又有從浦城江山分竄遂昌之謠等語雖昨據福興奏衢城連獲勝仗而賊勢既分要隘又多兼恐所謂兵勇未必盡能得力現在常山開化等處是否各有準備晏端書務當悉心調度毋稍疏虞至蘇省所需兵餉已屬浩繁再令協濟浙省勢難久恃著晏端書督同司道通籌全局於錢糧等款迅速催提以資接濟其杭嘉湖甯紹數府完善之區亦著該撫

督飭地方官會同紳董妥爲籌畫俾餉糈有著不至
專恃鄰省遷延貽誤至江南功在垂成兵力固難再
分然衢防設有鬆勁東南大局攸關已諭和春等萬
一浙中緊急祇可再撥勁旅赴援著該撫酌度情形
咨商辦理